

DISSERTATIO JURIDICA
DE
FRIGUSCULO

Von

Galt-Sinniger Liebe!

Quam

PRÆSIDE

PETRO MULLERO,
U. J. D. & PROF. PUBL.

ad d. Mart.

IN ICTORUM AUDITORIO

publicè ventilandam proponit

JOHANN GEORG BRENN/
Altenburg. Misnic.

JENÆ,
Typis PAULI EHRICHII. 1707.

FRANCIS

GEORGE

PETRO

LIBRARY



LIBRARY



I. N. J.

PROOEMIUM.

Sicut lignum rectum cum curvo aut curva duo inter sese convenire nequeunt dicente Musonio. Stob. *serm.* 78. ita non possunt alere concordiam discordes animi. Nunquam sane à Plin. *l.* 8. *Ep.* 5. eam esset consecutus laudem Macrinus, quod cum uxore vixerit annos 39. sine jurgio, sine offensa, nisi omnem discordiæ occasionem dissipare sedulò desudasset. Jure igitur cum Horat. *l.* 1. *Od.* 13. eundem omnesque illos vocabimus

*Felices ter & amplius,
quos irrupta tenet copula, nec malis
divulsus querimoniis
suprema citius solvit amor die.*

Enimvero, ut nulla æstas tam grata est tamque jucunda, quin & suos habeat nonnunquam imbres, nimbos, suas etiam procellas & turbines; ita vix ullum transfigitur conjugium sine omni planè friguscule. Nam dicto Terent. *Eun.* 1. 1.

*In amore hac omnia insunt vitia: injuria,
Suspiciones, inimicitia, inducia,
Bellum, Pax rursus.*

Hoc igitur, quia frequentissimum usum habet, nullibi tamen hætenus speciatim expositum vidi, pro tempore & viribus elaborare sum aggressus. Imploro interim ad sustentiam divinam, cujus ope auspicor

A 2

CAPUT

CAPUT. I.

continens

DEFINITIONEM NOMINALEM ET REALEM.

Th. I.

*Friguscu-
lum unde
dicatur.*

UT Res felicius explicetur, placet *Nominis* præmit-
tere *natales*. Quod Frigusculum debere vocabu-
lo *Frigus* nemo ambigit : Præterquam enim ,
quod & frigus quandoque languorum in aman-
do, dissenitunculam & offensionem significat, uti eodem
utitur Sueton. *in Aug.* 66. hanc quoque istius reddit ra-
tionem Rævardus : quia existente frigusculo frigeret affe-
ctio conjugalis, rei familiaris cura ; frigerent etiam mariti
& uxoris officia, donec ad concordiam reverterentur.

*Variè legi-
tur.*

Th. II. Variam videmus lectionem apud Au-
thores. Alii quippe cum nostro Imperatore legunt Fri-
busculum. *l. 32. §. 12. de donat. inter Vir. & Uxor*, alii *fribolum*,
Isid. orig. l. 9. c. 8. n. 40. friviculum, frivusculum, friviusculum,
frivolusculum, friunsculum. vid. Non. *c. 5. Barnab. Brisson.*
in Lex. Jur. & Martin. Lex. Philos. Quorum etsi quisque
suam habeat rationem derivationis, nobis tamen, eò quod
rem satius videatur exprimere, cum Vossio *Etymol. ling. lat.*
magis arridet *Frigusculum*.

Synon :

Th. III. Vocatur aliàs jurgium *in l. 31. ff. de Jur.*
dot. ubi Gothof. notat divortii & jurgii differentiam. Non
enim quodvis jurgium divortium facit ; Divortio matri-
monium esse desinit, at non jurgio. *l. 27. ff. de pact. dot. ibi :*
si liberia sublatia reversa est post jurgium per dissimulationem
mulier.

*Datur et-
iam inter
amicos.*

Th. IV. Quod & levis amicorum dissensio sic expri-
mi possit, non negamus, præsertim quum vocabulo fri-
goris hoc modo Sueton. *l. cit.* usus fuerit, nec non sæpius
Cicero & Fabius, testante Vossio. *l. cit.* Quia tamen sola
Lex 32. §. 12. de Donat. inter Vir & uxor. Dissertationem hanc
conscribere ansam dedit, lubuit hâc vice eam sequendo
illud tantum tractare Frigusculum, quod in matrimoniô
consummando æquè ac consummato accidere solet.

Th. V.

Th. V. Proinde tam inter sponfos existit quàm ^{Tam inter} Conjuges, per quos & illi intelligendi veniunt, qui vivunt ^{sponfos} in matrimoniò juris effectibus quibusdam destituto, quàm ^{con-} ^{juges.} le est v. g. Matrimonium ad Morgenaticam seu Morgengabicam, ut vocat Grotius l. 2. c. 7. §. 8. n. 3. de Jure B. & P. & hoc modo describi potest: quod sit *Intermissio amoris in-* ^{Descriptio.} *ter Sponfos vel Conjuges debiti, ita tamen, ut propterea sponsalia vel matrimonium rescindi nequeat.* Differt secundum majus & minus.

CAPUT II.

tradens

FRIGUSCULUM INTER SPONSOS.

Th. I.

ID quod Salust. in Jug. c. 27. ait: *Tam jurgiis trahi tem-* ^{Oritur in-} *pus, quàm gratia, & sponfi nonnunquam fateri cogun-* ^{ter Sponfos.} *tur; quippe tempus illud, quod est inter votum nuptiale & ejus consummationem, est spatium, quod vacat infidiis Diaboli, calumniis hominum, dissidiis desponsatorum, rumoribus & diffimationibus vulgi ex quibus tanquam scaturigine malorum, non possunt non existere diligenter cavenda, differente Carpzov. Jurispr. Confist. lib. 2. def. 132. n. 9. Hinc paradoxum haud videbitur: amoris calorem nonnunquam sequi frigusculum, & hujus onera sustinere illos, qui eò nihil magis fugere fatagant. Quàm variè autem hoc accadat, testatur quotidiana experientia.*

Th. II. Inprimis verò, ut præcipuarum causarum ^{Ob injuriat.} quasdam allegemus, lites inter sponfos movent *Injuria*, quæ tamen vel privatim voluntaria oblivione, vel subsidio Magistratus sunt conterendæ, nec sufficiunt ad solvendum perfecta sponsalia. Dedekenn. in Append. Consil. Theol. ad vol. 3. Sect. 13. num. 1. Sed si graves fuerint, tenetur pars nocens jussu Magistratus de non ostendendo inposterum præstare cautionem, ut idem monet l. cit. Unde judicare possumus, quod, quamvis insigniter moveat bilem, si quis sponforum ab alterius Parentibus verbis inju-

riosis excipiatur, non magis tamen dirimi sponsalia quam priori casu.

Qualem potestatem habeat sponsus in sponsam.

Th. III. Inquirendum hâc occasione, *an & quatenus sponsus maritalem potestatem exercere possit?* Ex iis quidem, quæ communiter DD. ad tit. *de sponsal.* tradunt, videmus, voluisse quosdam sponsam transire in potestatem sponsi, modo sponsalia fuerint secuta: Quod etiam Juri Naturæ consentaneum esse censet Tiraquellus *ad Leg. Conn. 1.* Quibus tamen tam facile consentire non possumus, sed ante mutuam utriusque conjunctionem maritale imperium non nasci, verius esse putamus: ut proinde moribus nostris sponsus juribus marito competentibus uti frui haud possit. Quam sententiam communem esse Theolog. & Juris Doctorum affirmat Bodinus *l. 1. de Republ. c. 3.* Interim tamen, quoniam Jure Civili de effectibus potestatis maritalis quibusdam participat sponsus. *vid. l. 15. §. 24. ff. de Injur. l. 13. §. 3. ad L. Jul. de adult.* ipsi aliqualem saltem potestatem in sponsam quodammodo concedimus.

Friguscul. ob abusum potestatis.

Th. IV. Hâc satis limitatâ potestate si vel minimum abutitur sponsus, Frigusculo dabit occasionem, quare quousque extendenda sit? videndum. Consistit ea solum in *modestâ & mitti correctione*, si opus & sorte morum aut alium defectum notabilem subesse intelligat, & sic ad quæstionem, *An possit uti verberibus?* omninò negativè respondendum est. Neque enim potest sponsam quis excipere minis aut injuriis, quam blanditiis ad nuptias allicere debet. *vid. Carpz. in Jurisprud. Consist. l. 2. def. 212. n. 4.*

Ob diurnam absentiam.

Th. V. *Absentia* diurna itidem promovet remissionem debiti amoris, & quidem ea, quæ ob varias rationes suspecta videtur. Unde *Qu. Quamdiu sponsa absentem sponsum expectare teneatur, priusquam cum alio sponsalia celebrare possit?* Jure Civili, si nullum certum tempus præfixum fuerit, & sponsus in eadem degit provinciâ, per biennium expectandum erit, quò elapsò, iterum alii potest nubere. *l. 2. C. de sponsal.* Aliud dicendum, si extra Provinciam

ciam vivit, tunc enim triennium requiritur, l. 2. C. de repud. Si tamen sponsi iusta & necessaria est absentia, etiam quadriennium vel longius adhuc tempus debet expectare l. 17. ff. de sponsal. l. 60. §. 4. de rit. nupt. add Brunell. de sponsal. Concl. 8. n. 3. Covarruv. part. 1. c. 5. in init. num. 7. Quod si verò ob nimis diurnam sponsi absentiam nuptiæ secutæ non fuerint, quaeritur, *An sponsalitiæ largitates ab ipso condici possint, si sponsa cum alio contraxerit matrimonium?* Non posse condici, si iusta absentiae causa in sponso deficiat & illum per legitimum tempus expectaverit sponsa, hoc Resp. Juris: Ob es nun wol von aussen das Ansehen als wann N. beydes die arrhas, als auch was Sie sonst *ex largitate sponsalitia* von Ihm bekommen mit recht wiederfordern könnte/gleichwol hat N. oder die Seinigen an O. nichts zu fordern von Rechts wegen: probat D. Tabor. Relat. Argentor. 74. pag. 157.

Th. VI. Minuit insuper veram affectionem, si spon- forum alter sentit, naturam alteri denegasse aptitudinem ad amicabilem & optatam conversationem. De comperta ab aliis inhabilitate & coeundi impotentia, quin sit causa repudii, non est dubitandum. Magnificus D. STRUV. Synt. 7. Civ. Exerc. 29. ib. 14. add Carpzov. Jurisprud. Confist. l. 2. def. 200. & 201. *An verò gravis anhelitus foetor sufficiat ad concedendum repudium?* dubitari posset. Affirmat Mevius Part. 4. decis. 43. n. 8. add Diana Resolut. Moral. Tom. 2. Tr. 6. resol. 15. Quod verò, ut benè monet D. Stryck. in Tr. de Sensibus D. 5. c. 2. n. 11. & 12. intelligendum erit (1) si foetor supervenerit. (2) si sit gravis & molestus, qualis fortè describitur à Plaut. in Merc. Act. 3. scen. 3.

Ob ineptitudinem ad amicabilem conversationem.

Jam plenus ætatis, anima que foetida

Senex hircosus Tu osculere mulierem?

Uti ne adveniens vomitum excutias mulieri.

Et (3) ut originem habeat ex vitio corporis, & sanari remediis neutiquam possit, velut ille qui oritur ex oris illuvie. Interim laudandæ hoc casu essent sponsæ, si, quod de Cnei Duellii uxore legitur, hoc vitium omnibus innatum putarent viris, & sic tanquam commune & inevitabile malum

malum patientiâ vincerent. Similiter dissolvi posse sponsalia ob supervenientem alterius *cæcitatem*, patet ex eo, quod habet D. Stryk. *loc. cit. c. 2. n. 6. 7. an verò si alterum oculum saltim amiserit liceat resilire?* quæri potest. Quod tam facilè non permittendum est, ob evidentem partialis & totalis oculorû privationis & resultantis exinde deformitatis aut inhabilitatis diversitatem; nisi propterea matrimonium metuendum esset infelix: hõc enim casu ob quamlibet insignem deformitatem permittunt Dd. repudium. Carpz. *J. Pr. Consist. l. 2. tit. 10. def. 181. n. 4. Cypræus de sponsal. c. 13. §. 67. 68.*

*Frigusc. ob
non illatam
dotem.*

Th. VII. Videmûs hâc Pæsertim ætate dotem quæri non tam in pudicitia, quàm aurô & argentô & nummis postponi virtutem: quod sane pariter non difficilem causam præbet amoris neglectui; imò, si sub conditione, ut certa summa inferatur, sponsalia contracta fuerint, conditione hâc non impleta, potest resilire sponsus, quamvis solum infortunium huic causam dederit, vid. D. PRÆSES in *Tr. de Annul. Pronub. tb. 22.* quod tamen non dicendum de illis, quæ copulâ sunt purificata. *c. per tuas ubi Gl. & DD. de Condit. appof. Magnif. DN. STRUV. Ex. 29. tb. 5.*

*Frigusculû
excitant
Proxenetæ.*

Th. VIII. Proxenetis nonnunquam adscribendum est frigusculum, utpote quorum proprium est, receptâ pecuniâ, non minus ut pictores, ex Rana Dianam facere, ita ut sæpè formosam promittant, quæ est deformis & divitem prædicent, cum labore inopiâ. Hinc etiam Limnæus in *Notit. Regn. Franc. l. 2. c. 19.* culpat Illustrium Personarum errorem, quod aliorum relationi, oculis aut pictoris penicillo in hoc passu nimium fidant. vid. D. PRÆSES in *Præf. Dom. Illustr. c. 2. pos. 3.* Neque enim potest dissolvi matrimonium, si contrahens inductus fuerit tali errore, qui saltim versatur circa qualitatem & fortunam. Wesemb. *de rit. nupt. n. 8.*

*Mutuo dis-
sensus non
dissolvit*

Th. IX. Perfectis sponsalibus ob frigusculum non habet locum *pænitentia*. vid. Excellentiss. Juris Antecessor DN. D. ROTH. in *Dissert. Inaug. de Pænitentia & Vol. mutat.*

c. 9. adeò, ut nec mutuus dissensus diris devotionibus *sponsalia, ut*
 & execrationibus confirmatus ad dissolvendum sufficiat *nec remissio*
l. 8. C. de repud. c. 18. & 26. X. de jurej. Ridenda quoque est *annuli prae-*
 istorum opinio, qui remissione annuli pronubi aut arrha- *nubi.*
 rum dissolvi posse sponsalia autumant; cum hoc ita ne-
 quaquam fieri possit, sed potius pactis stare necesse ha-
 beant contrahentes. vid. D. PRÆSES *l. cit. lb. 29.* Nec
 contrarium obtinet, quamvis alteruter sponсорum præter
 redditionem arrharum se occultaverit: nisi neglectis ci-
 tationibus diversis sese malitiosum sponsæ desertorem
 declaraverit; tunc quippe innocenti publicâ authoritate
 permittitur aliud inire matrimonium. Dedekenn. *Conf.*
Theol. vol. 3. l. 2. sect. 13. n. 7. Tantum de Frigusculo inter
 Sponsos. Plura huc facientia in cap. sequenti tractabun-
 tur, quæ ob affinitatem peculiariter hic itidem explicare
 opus non fuit.

CAPUT III.

proponens

FRIGUSCULUM INTER CONJUGES.

Th. I.

E Quidem marito, de omni jure tam divino quam *Potestas mar-*
 humano, potestas est in uxorem. Tiraquell. *leg. ritualis in*
Conn. l. ea tamen est exercenda amore & prudentia quibus con-
 quod vult Apostolus *Eph. 5. v. 25. & 28. Petr. 1. epist. 3.* *sistat.*
 & amicum debet esse imperium Viri, quale ante lapsum
 in Paradiso fingit August. in *l. 2. ad Gen. c. 27.* dilectionis
 potius quam conditionis, neque cum uxore agendum est
 ut cum serva, sed ut cum socia. Arist. *8. Ethic. c. 10. & seqq.*
 consideret quippe maritus, quòd ipse & uxor sint caro u-
 na; nemo autem carnem suam unquam odio habuit, sed
 nutrit & fovet eam, *Ephes. 5. vers. 25.* insuper etiam, quod
 uxor sit socia divini & humani juris. *l. 1. ff. de rit. nupt. l. 4.*
C. de crim. expil. b. a. red. Quod si uxor dominetur & mari-
 tus vincatur, judicio Augustini in *Psal. 143.* Pax perversa
 est; sin autem marito dominanti uxor subjiciatur, Pax

B

recta.

recta. Hinc non debet consistere in vi aut metu, qui discutit amorem eumque facit frigidari.

*Permissa est
marito cor-
rectio que-
dam uxoris.*

Th. II. Neque tamen semper debet maritus omnia verba sesamo, papavere ac violis vestire, sed obloquentem mulierem increpare, imò increpidare ei fas est, prout loquitur Mich. Havemann. *de jur. Connub. l. 3. tit. 8.* præsertim cum mulieres, uti o dēva dixit, molendinis similes sint, quibus æquè semper aliquid est, quod emendetur; Leges ergo atque Canones modicam castigationem marito concedunt, *arg. l. 5. §. fin. ff. ad L. Aquil. c. placuit 33. q. 4.* Tiraquell. *in l. Connub. num. 22.* Sed talem, quæ liberos homines decet, & quæ animum potius afficiat & commoveat, quàm corpus lædat. *arg. l. l. C. de emend. propinqu. vid. dist. 44. per tot.*

*Ignoscat
quandoque
uxori ma-
ritus.*

Th. III. Peccanti uxori, quantum fieri potest, nec forsitan delicti gravitas obstat, facile ignoscat exemplo Socratis Laërt. *l. 2. c. 5.* Videntur enim uxorum delicta ex maritorum culpa sæpius venire. Sic haud abs re Gvazz. *de Civil. Conv. diff. 5.* inquit: Hinc sibi quis certò persuadeat, uxorum errores seu delicta maxima ex parte à maritorum culpa originem trahere: qui plus justo plenariam connubialium legem observantiam ab illis exigunt, quas tamen ipsi ne minimum quidem observant, inveniuntur enim, qui etsi à DEI manu optatum adepti sunt uxoris consortium: eum tamen adversus illam cum linguâ tum manibus rigorem exercent, eoque utuntur imperiò, quod in servos & catenata mancipia solet usurpari: & si foris, dum sunt extra aedes, fortè offenduntur, tum domi in uxores id evomunt & pœnas de iis sumunt; erga alios quidem abjectos se gerentes, feroces verò & Leones erga uxores. Probe Gellius *l. i.* vitium uxoris aut tollendum aut ferendum est: qui tollit commodiorem præstat; qui fert sese meliorem facit. Et Ovid, *l. 3. amor. El. 4.*

Desine, crede mihi, vitia irritare vetando.

Obsequio vinces aptius ipse tuo.

Vidi

Vidi ego nuper equum contra sua frena tenacem

Ore reluctanti fulminis ira modo:

Constitit, ut primum concessas sensu habenas,

Frenaque in effusas laxa jacere jubas.

Th. IV. Hinc quaeritur, an marito liceat uxorem ex imbecillitate peccantem verberare? Resp. Imperatores Theodosius & Valent. in l. consens. 8. C. de repud. quod verbera in-
An maritus possit uti verberibus.
 genuis aliena sint, & si mulier se à marito verberibus affectam probaverit, posse eam uti repudii auxilio, quod tamen in Novell. 117. c. 14. postea est correctum. Fatemur eum uxore indignum, qui, nescio quis, dixit:

Nux, Asinus, Mulier, simili sunt lege ligati,

hæc tria nil faciunt rectè, si verbera cessent.

Neque tamen possumus negare in casu extremæ necessitatis, cum monita omnia sint frustranea, pro ratione peccati admissi, concessam esse potestatem marito, verberibus moderatis coercere uxorem. Tolet. l. 5. Instr. Sacerd. c. 2. n. 2. pag. 710. Ames l. 5. Conscient. c. 37. q. 5. tb. 14. p. 357. Plura hanc quæst. illustrantia possunt videri apud Arnif. de J. Conn c. 7. s. 4. n. 5. §. 9. & Gvazz. l. c. p. m. 439. add. Grot. de J. B. & P. l. 2. c. 20. §. 7. n. 2. it. l. 3. c. 1. §. 4. n. 2. it. Carpz. 7Pr. Consc. l. 2. def. 212. n. 1.

Th. V. An autem uxor propter alapam acceptam possit petere divortium? benè distinguit D. Strykius Dissert. de Alapam uxor petere possit divortium. c. 2. an culpa uxoris præcesserit, & ita non poterit; quia maritus tunc suo jure fuit usus ac nemini injuriam fecit, l. 13. §. 1. ff. de injur. Neque dici poterit uxor immoderatè verberata, quæ alapam est passa, Farinac. q. 143. n. 104. an verò uxoris nulla culpa præcesserit: tunc si maritus jure suo abutatur, meritò eòdem privandus erit, per reg. general. quod, quicumque abutitur jure suo, se reddat eò indignum. Ergò si maritus alapas citra causam sæpius reiteret, audienda erit, si divortium parziale seu separationem à thoro & mensâ petierit, & eò citius quidem, si alapam tanta fuerit vis, ut & sanguinem elicuerit. Ubi tamen in fine addit: unam atque alteram alapam pa-

tienti animô uxor feret, memor illius: melius esse mala pati, quàm facere. Multo magis autem ignoscet marito infligenti alapam uxor, quæ ignorante marito extra ædes noctu mansit vel Comœdiis interfuit. *Nov. 117. c. 8. D. Stryk. de Alapa. c. 2. ib. 2. n. 8.* Correctio quædam ista facit ad virtutem, cum mulier casta vagando meretrix fieri possit, uti Poeta de *Levina* scribit, quæ cum antea castissima esset, domo tamen non contenta, sed nunc Lucrinum, nunc Avernum provecta, nunc Bajas, meretrix facta est:

*Incidit in flammæ juvenemque secuta relicto
conjuge, Penelope venit, abiit Helena.*

*Uxori an
conceden-
dum Impe-
rium.*

Th. VI. Imperiosæ mulieres ægrè subsunt potestati maritorum, unde rixæ, friguscula & quid non? Quid si tamen sponsus astu amoris adactus, promiserit, & quidem juratò, se concessurum uxori suæ imperandi potestatem, an pactum istud servare teneatur? Resp. pacta, quæ sunt contra jus divinum & bonos mores, etiamsi juramento sint confirmata, non sunt servanda. *l. 7. §. 16. l. 38. ff. de pact. c. 18. de jurej. c. 13. qu. 3.* nec ad ea, quæ cum legibus divinis, humanis & ipsa honestate pugnant, quis se obligare potest. *Bodin. l. 1. de Rep. c. 3.* Pactum autem de concedendo uxori Imperio contra jus divinum est, utpote quò marito expressè Imperium concessum legimus. *Gen. 3. v. 16. Epist. Paul. ad Eph. 5. v. 22. ad Coloss. 3. v. 8. 1. Petr. 3. v. 1. ad Corinth. 11. v. 3.* Contra Jus Gentium, quippe hòc maritus semper habitus fuit dominus uxoris. *Gudelin. l. 1. de jur. noviss. c. 7.* Item contra Jus Civile, hìc enim uxores maritos suos appellant dominos. *l. 58. pr. ff. de donat inter Vir. & Ux. l. 88. §. 2. ff. de leg. 2. l. 12. C. qui potior. in pign.* Contra Jus Canonicum est, quo maritus caput uxoris constituitur. *c. 15. caus. 33. qu. 5.* & mulier disertè dicitur subjecta esse dominio viri, nullamque authoritatem habere. *can. 17. ibid.*

*Uxor mari-
to licet in-
fer. Condit.
obedire de-
bet.*

Th. VII. Nec est, quod uxor ortu illustris marito inferioris sortis potestatem maritalem exercenti indigne-
tur, legitimo enim inito matrimonio, quicumque etiam
sit,

fit, huic potestati exercendæ idoneus meritò habetur, neque enim leges matrimonii inter illustrem & humilem distinguunt. vid. l. 1. C. de dignit. l. 10. C. de nupt. l. 8. ff. de senator. exempla vide apud Myler in Gamolog. cap. 5.

Th. VIII. Ob dotem marito promissam nec solutam *Dos non soluta movet* friguscula oriuntur. Benè Gail. l. 2. Obs. 87. n. 4. ait: Per-
niciosè peccant eâ in re quandoque ambitiosi parentes, *friguscul.*
qui in tractatu matrimonii aureos montes pollicentur, nuptiis verò subsecutis & celebratis parum aut nihil præstare volunt. Hinc est, quod hujusmodi matrimonia plerunque sint infau-
sta, perpetuis litibus & jurgiis plena atque funestos exitus habeant. *An autem Maritus ex causa non acceptæ dotis uxorem expellere aut eidem alimenta denegare possit, queritur?* Et ita putant Gail. d. obs. n. 2. Coler. l. 1. de alim. c. 10. n. 5. Schneidew. ad §. fuerat §. de Action. Myns. Cent. obs. 64. & quod deceptis potius quàm decipientibus succurrendum l. 1. ff. de dol. mal.. Humanior tamen & æquior videtur contraria sententia. Quamvis enim dos pro oneribus matrimonii constituatur, illud tamen non propter dotem contrahitur, illaque cohabitatio non à dote, sed ab ipsa lege naturali & divinâ & ex ipso matrimonii contractu oritur; adde quod Christus *Matth. 5.* omne divortium vocaverit illicitum extra causam fornicationis. vid. D. Meerbach. Diff. sub Præf. Magnif. D. STRUV. de jur. divort. c. 5. ib. 36. & si maritus gratis, vel propter DEUM aut honestatem publicam, uxorem alere recuset, amorem, opera conjugalia, puerperia, obsequia, officia & operas uxoris æstimet, atque inde ad alimentâ se obstrictum agnoscat. Henn. Gross. qu. Jur. decad. 2. qu. 5. imo licet promissam dotem non solverit, talis tamen verè est manet, utique etiam jura uxoris habet l. pen. pr. & l. 1. C. de repud. Huic sententiæ subscribunt Francisc. Hotom. in tr. de dol. n. 71. & 72. per Nov. 22. c. 7. Nov. 53. c. 6. Novell. 117. c. 3. Alber. Gent. l. 6. c. 5. Fachin. l. 3. Controv. 48. Beust. de matrim. c. 66. Sanchez. de matr. 9. d. 5. n. 17. Covarruv. p. 2. c. 7. n. 2. Hunn. ad Treutl. vol. 2. disp. 7. ib. 5. qu. 37. ubi ad contraria respon-

det; novissimè DN. Fabricius in *Repetit. Gail. l. 2. obs. 87.*
Confil. Theol. Witteb. part. 4. pag. 90.

Ratione bonorum existunt jurgia

Th. IX. Quandoque ratione *bonorum* inter conjuges lites crescunt, puta si tempore sponsaliorum ita conventum fuerit, ut futurus maritus certa bona, quæ sunt mulieri propria, utenda fruenda habeat, donec ad pinguiorem fortunam pervenerit, postmodum uxor ditio-rem factum maritum asserat, nec probet, repetatque bonorum suorum administrationem, & si renuat maritus, uxor non debet divertere vel abesse, cum discedere non possit, nisi ob fornicationem. *c. uxor. caus. quod in omn. 32. qu. 7.* Elegans respons. vid. in *Conf. Witteb. P. 4. p. 54.* Pariter ex divisis bonorum dominiis & administrationibus solent subnasci discordiæ semina. fatente Scip. Gentil, *l. 1. de donat inter Vir. & Ux. c. 15. ad fin.*

It. ob denegationem debiti conjugalis.

Th. X. Inprimis etiam ex denegatione *Debiti conjugalis* oriuntur jurgia. Officium mariti inter alia est, præstare uxori debitum naturale, & maximum ac præcipuum foeminarum munus est, concipere aut tueri conceptum *l. queritur 14. §. 1. ff. de adilit. edict. l. 2. §. 1. C. de ind. viduit. toll.* nec enim ob aliud, ait Augustinus, foemina nubit, quam ut mater fiat, unde & matrimonium dictum Schönborn. *l. 1. Pol. c. 6.* neque uxor illud deneget marito: ita Catullus in *Epithal. Jul. & Tull.*

*Nupta tu quoque, quæ tuus
vir petet, cave ne neges.
ne petitum aliunde eat.*

Conjux conjugii debitum conjugale seriò ac rationabiliter petenti reddere tenetur, hæc enim obligatio pertinet ad bonum fidei conjugalis, secundum quam conjuges inter se conjugii usum præstare debent, teste Apost. *1. Cor. 7.* uxori vir debitum reddat, similiter autem & uxor viro, idque sive expressè petatur, sive tacitè, ut cum uxor præ reverentia verbis expressis petere non audet, explicante S. Thom. in *4. dist. 32. q. un. a. 2. qu. 1.* Navarr. *c. 16. n. 26.* & tradente P. Laymann. *Theol. Moral. l. 5. tr. II. p. 3. c. 1. num. 1.*

Con-

Confessionarius interdum Coniuges de præstatione huius debiti commune facere debet. Levior autem est injuria, si Coniux Conjugem petentem precibus avertat, si id non ægrè nimis videatur laturus. Sanchez. *l. 9. Diss. 2. n. 10.* Laym. *l. cit. & ibid.* plura. Nimia tamen multiplicatio prolis ordinariè non excusat à redditione debiti Coniugalìs, nisi accedat mutuum pactum. Id. *l. c. n. 16.* Licitè alias denegari poterit, si debitum reddituro grave salutis corporalis periculum timeatur. Ibid. *n. 5.* Idem licet Coniugi adultero denegare, *n. 3. & 4.* Quid si verò Coniux leprosus fiat, an alter Coniux sanus omninò sit liberandus ab obligatione debiti præstandi? Negat Laymann. *ibid. n. 6.* exceptis quibusdam casibus. Amplexum tamen connubialem partem sanam præstare non cogi, æquum videtur Gothofredo ad Schneidew. *J. de Patr. potest. l. 11. C.* durum enim est, ut coniux sanus contagioso conjugalem amplexum reddere teneatur: nec licet malum facere, ut eveniant bona. Aliud dicendum in sano, si pertinax & omnimoda denegatio debiti sit, tunc enim separatio locum habet, ut responderunt Tubingenses ap. Besold. *Vol. 3. Cons. 27. DNN.* Theologos Jenenses anno 1668. pronunciaſſe refert D. Richter *Vol. 2. part. 1. Cons. 26.* Si ligatio ligularum das Nestel knüpfen / procurante Diabolo, minùs aptos fecit conjuges ad præstandum debitum, æquo ferendum est animo, nec propterea fieri potest separatio. vid. D. PRÆSES in *Ann. Pron. ib. ult.*

Th. XI. Rixandi & irascendi ansam habere videtur maritus, si uxor partum non benè tuetur, causamque dat abortui. Quod fieri solet, vel per cincturam nimis strictam, ut Coriolani Neptis; vel per saltationem immodicam ut Curii triumphantis soror; vel per variorum ciborum injurgitationem, ut soror C. Divillii. Val. Max. *l. 4. c. 6.* Guevarr. in *Horol. Princ.* Schönb. *Polit. l. 1. c. 8.*

Th. XII. Nascuntur etiam sæpius jurgia propter oscula extraneo infixæ, quoniam eadem ceu gladiatoris Veneris & libidinis antecœnia Taubm. ad *Plant. Cure. Act. 1. sc. 1.* *Oscula extraneo fixæ movent suspicionem.*

sc. i. v. 5. inter ipsissima adulterii procœmia referuntur, DN. Hekel. *eleg. disc. philol. de Osculis* c. 6. & nihil dicente Petronio *Satyr.* c. 68. ad incendium gravius osculô, quia satiari nequit & spem dulcem suppeditat, imô ea quæ oscula non negat, nec tandem negat cætera. Gruter. *in Bibl. Exul. sub tit. Osculi.* Ut propterea velint Jcutorum nonnulli mulierem, quæ aliquem præter maritum se deosculari passa est, dotem non secus ac propter commissum adulterium perdere. vid. D. Stryk. *Tr. de Jur. Sens. d. 7. c. 5. n. 10.* Habeat ergo conjux, quod irascatur, nisi mos regionis præbeat excusationem, uti Andr. Hereboord *Exerc. Eth.* 44. *ib.* 4. judicat, apud Batavos hodiè in usu esse, advenientes osculari, illaque oscula innoxia esse, & absque libidinis titillatione, solius officii causa castè impigni posse; ut ibi locum habeat dictum Plauti *Curcul. Act. 1. sc. 1.*

Osculando quedam non fit impudicitior.

Add. D. PRÆSES *in Commentat. de Osculo Sancto. cap. 8. num. 3.* Multo magis caveat à literis amatorii, quæ magnam suspicionem præbent: an & quatenus ad fœminam missæ, sint adulterii vel stupri indicium? vid. Bocer. *de quest. & tort. p. 271.* Menoch. *l. 5. Præs. 41. n. ult.* Mascard. *de Probat. Vol. 1. Concl. 64. n. 20.*

*Zelotypia
obstat amo-
ri Conjug.*

Th. XIII. Diffidentia fidei conjugalis seu *Zelotypia* summoperè disturbat amorē, & maximas movet lites. Supremus omnium fœminini sexus affectum esse traditur à Scal. 3. *Poet.* 14. & inter mulierum proprias & peculiare animi perturbationes *Zelotypiam* reponit Plutarchus *lib. de tranqu. anim.* Honoris tamen, quem præstare debet uxor marito, sequela & pars est, ne ex levī causa suspensiones concipiat, vel se *Zelotypiæ* subjiciat. Præterquam enim, quod ea res occasionem præbet alienationis animorum, pericula etiam non levia inde nasci solent. Schönborn. *Polit. l. 1. c. 6.* Rex Arragoniæ Alphonfus dicere solebat, ita demum matrimonium tranquillè citraque querimonias exigi posse, si maritus surdus fiat, uxor cæca. Innuens, opinior, fœmineum genus obnoxium esse *Zelotypiæ*,

piæ, atque hinc oriri rixas & quærimonias: rursus maritis permolestum esse uxorum garrulitatem; qua molestia cariturus sit, si fiat surdus, nec illa vexabitur adulterii suspicione, si careat oculis. Manut. in Apoph.

Hoc quidem maximum: Nunquam oportet virum sapientem

nimis custodire uxorem in penetralibus domus.

Menander.

Dure vir, imposito teneræ custode puellæ,

Nil agis: ingenio quæque tuenda suo est:

*Si qua metu dempto casta est, ea denique casta est,
quæ quia non liceat, non facit, illa facit.*

*Ut jam servâris benè corpus, adultera mens est:
ne custodiri, nî velit, ulla potest.*

*Nec mentem servare potes, licet omnia claudas,
omnibus exclusis intus adulter erit.*

*Cui peccare licet, peccat minus: ipsa potestas
Semina nequitiae languidiora facit.*

Ovid. l. 3. Eleg.

Th. XIV. Unde colligere licet, quanta incommoda & inimicitias *Polygamia*, si unquam permetteretur, secum *generat frigusculum.* latura sit. Nam ubi Zelotypia animos Cohabitantium transversum agit, & suspicio amicitiae fœdus divellit, quid ibi expectes præter odia, dissidia, rixas & in apertam ruinam defituras infidias? Documenta nobis sint sanctorum Patrum matrimonia. Non prius enim conscenderat lectum Heri, Agar, quàm Zelotypia Saræ sese exerere ceperat, Gen. 16. vid. Arnif. de jure Connub. cap. 4. sect. 3. n. 10. & seqq. it. sect. 4. n. 1. &c.

Th. XV. *Secunda nuptia*, præsertim si liberi ex diversis matrimoniis adsunt, sine jurgiis non solent esse, id quod exprimit Hieronymus: si evenerit, inquit, ut ex secundo marito habeas filios domesticos, oritur pugna intestinum prælium. Non licebit tibi amare liberos, nec æquis aspicere oculis, quos antea genuisti. Clam porrigescibos, invidebis mortuo, & nisi oderis filios, adhuc

Secunde nuptia raro extra lites consistunt.

C

eorum

eorum videberis amare patrem. Quod si vir ex priori uxore sobolem habens domum Te introduxerit, etiam si clementissima fueris, omnes Comædi & mimographi in novercam sævissimam reclamabunt. Si privignus languerit & condoluerit caput, infamaberis ut venefica; si non dederis cibos, crudelis &c. Vid, D. PRÆSES in *Præsid. Dom. Illustr. cap. 4. Pos. 10.* Omnium pessimum est, quod mutato concubitu Parentes plerumque à liberis primi matrimonii depraventur, Ambros. 6. *Hexamet.* & ex mente Euripidis: Cui non est satis unum novisse cubile, is omnem erga liberos deponit affectum. D. Hulder. Eiben. *de Tutel. fæmin. p. 39.*

Uxor ad secundas nuptias transiens deponat rationes prius tutelæ gestæ, ne litigia inter Conjuges oriantur.

Th. XVI. Sine collisione & jurgiis non erit matrimonium, si maritus viduam, quæ liberorum prioris matrimonii tutelam hæctenus gesserat, nec ante nuptias posteriores consummatas reddiderat rationem, uxorem duxit, postmodum verò à liberis istis conveniatur; Expediti enim juris est ex l. 6. C. in quibus caus. pign. vel hyp. & l. 2. C. quando mulier tutel. off. Nov. 22. c. 40. quod quando mater tutelam gerit liberorum, & prius ad secundas nuptias convolat, quàm reddidit rationes reliquaque solvit, non tantum ipsius, sed & novi mariti bona liberis tacitè esse obligata. Ratio juxta Brunnem. *ad dict. l. 6.* esse videtur, quia novus maritus omnis culpæ expers haud existimatur, qui viduam liberis ex gestione tutelæ obligatam in uxorem ducit, cum plerumque hoc tendat ad præjudicium liberorum, vid. Berlich. *P. 1. Conc. 67. n. 82.* vel potius, quod novæ nuptiæ plerumque soleant non tantum bona filiorum, sed etiam corpus & vitam novis maritis addicere, rescribente Imperat. Constantin. in l. 22. C. de admin. tut. D. Lauterbach *Dissert. de tacit. pign. lib. 38.* Hahn. ad Wesemb. *ff. in quibus caus. pign. n. 1.* Franzk. *tit. de pign. n. 35.* Steph. Fagundez *de j. & j. l. 7. c. 4. n. 6.* Unde Baldus ad eandem legem monet, cavere sibi debere eum, qui viduam in uxorem ducit, ne alieno periculo se exponat.

Th. XVII. *Prodiga mariti vita generat frigusculum.* *Prodigi ma-*
Isto enim ad incitas redactô mulier egere necesse habet. *riti vita est*
Hinc constante matrimonio à muliere dos eô casu repe- *causa fri-*
titur. l. 29. §. 30. C. de Jur. Dot. l. 24. ff. solut. matr. cum do- *gusculi.*
tium causa semper & ubique sit favorabilis, & expediat
Reipublicæ dotes mulieribus conservari. l. 1. ff. sol. matr.
Ideo Legislatores remedia concesserunt mulieribus, ut
dos salva esse possit. vid. Andr. Rauchbar. P. 1. qu. 33. Pro-
banda tamen est objecta mariti paupertas. Carpz. P. 2.
c. 24. def. 11. atque ita Lipsiæ judicatum esse refert. n. 5.
add. Mævius ad Jus Lubecens. l. 1. tit. 5. ad 7. Gail. l. 2. Obs. 53.

Th. XVIII. Friget omninô amor, si more Criceto- *It. amotio*
rum Conjux alteri res *furtivâ* aufert manu. Cum enim *rerum clan-*
illi junctis operis necessariam annonam in hyemem con- *destina.*
gestam subterraneis apothecis recondierint, mas fœmel-
lam domo ejicit & à præsepibus arcet. Illa dolum dolo
ulciscitur, perque occultos cuniculos subrepens horrea
perfidii mariti compilat, donec in gratiam redeant. Hinc
proverbium in ejusmodi Conjuges: Ein ungetreuer Ham-
ster. Urfin. Acerr. pag. 165. Similiter & viri faciunt uxori
pecuniam furtim auferentes vel extorquentes, ut gulæ in-
serviant, & quoniam sibi ita per fœminas victum quære-
re satagunt, mores Zingarorum videntur imitari. Came-
rar. Hor. subcis. Cent. 1. cap. 17.

Th. XIX. Cavendum marito. ne author frigusculi *Sicut & In-*
fiat evomendô *Injurias* adversus mulierem, quæ inde ad *jurie.*
iram commovetur. Quem enim fugit iracundia mulie-
rum, quâ præcipites feruntur in ferrum in necem tam su-
am quam suorum, prout canit Juvenal. in calce satyr. 6.

----- quoties facit ira nocentem
hunc sexum, rabie jecur incendente feruntur
præcipites: ut saxa jugis abrupta, quibus mons
subtrahitur, clivoque latus pendente recedit.

Ut non immeritô Seneca muliebri dixerit in ira furere, l. 1.
de Clem. iramque vitium esse muliebri, in lib. de ira, & Chry-
sost. in Homil. de decollat. Div. Johannis, mulierem, si injuri-
am patiatur, insanire

*It. Delictum
commissum,
& celatum.*

Th. XX. Ob *delictum commissum* oriuntur dissidia, neque tamen propterea semper matrimonium dirimi potest, imò Conjux propter indissolubilem vitæ consuetudinem tenetur Conjugem ob ejusmodi crimen deportatum sequi, nisi necessitate quadam domi detineatur *c. 2. X. de divort.* vid. Præjudic. in delictô furti ap. Carpzov. *l. 2. def. 203.* Similiter frigusculum oritur si ante consummatum matrimonium fuerit *celatum delictum commissum*, tunc Conjugum alter alteri irasci solet. Num autem *stante matrimonio* Conjux occultum matrimonii impedimentum alteri *dete- gere teneatur?* Resp. quod non, quia exinde plerumque plura & deteriora mala nascuntur, neque solet esse spes futuræ utilitatis. Azor. *lib. 2. Inst. Moral. c. 19. qu. 4.* *Reuè an malè faciant uxores de impudicitia ab aliis appellatæ, si maritis hoc indicaverint?* lege Guazz. *de Civ. Convers. Diff. 5.* dicentem: Ejusmodi fœminas plerumque reprehendi, cum mali id sequantur effectus. Etsi enim bonus videatur esse affectus, fidei suæ signum dare, & mariti animum quietum ac tranquillum reddere; Effectus tamen ille est malus sollicitat quippe maritus & eidem dubitandi occasionem suppeditat, ne hunc relevando amorem alium occultet.

*Mutatio Re-
ligionis fri-
gusculum
gignit.*

Th. XXI. Mutatio *religionis*, quæ fit constante matri- monio, plerumq; mutat animos, siquidē nec animorum; ubi non est animarum, unio. Ob hæresin tamen tam præ- cedentem quàm supervenientem matrimonium dissolvi nequit, quia hæresis cum matrimonii substantialibus non pugnat. D. Gerhard. *de Conjug. §. 668.* & ita Lipsiæ in Con- sist. anno 1642. responsum est, weil nach bewehrter Theolo- gorum und Consistoriorum Meinung die Veränderung der Religion die Ehe nicht trennet/ so seyð ihr auf eine Desertion zu flagen nicht befugt. Dn. Meerbach. *Diff. Inaug. de jure di- vort. sub. Præf. Magnif. D. STRUVII habita cap. 5. th. 4.*

*Similiter &
alterius con-
jugis senium*

Th. XXII. Friget ut plurimum amor *Juvenulæ* erga *Senem.* Talia conjugia vel maximè infelicia sunt. Jun. *part. 2. qu. Posit. 29.* quoniam amicitiam nihil connectit nisi

nisi æqualitas. Boet. 1. d. *Mus.* c. 1. perpetua verò, ut ætatum ita morum inæqualitas distrahit vetulas à juvenibus. Ubi igitur constans amor non conglutinat animos, sed lites & disparia studia distrahunt, quid illic emolumentum speres? Arnif. d. jur. Conn. c. 2. sect. 4. n. 30.

*Propitèr opes tenerara vendit quicunque juvencam
mercatur lites & sine fine dolos.*

*Nulla quies illud recreat, pax nulla fovebit,
semper habet rixas, pax ibi nulla frequens.*

Cas. 1. *Oec.* c. 4. q. 3. vid. Manut. l. 8. *Epist.* 3. D. PRÆSES in *Præsid. Dom. Illustr.* c. 4. *Posit.* 2. ubi Qu. an seni iteranda sint nuptiæ? & negativa ferè concluditur sententia; vivis enim maritis viduæ evadunt & probè norunt, quæ id expertæ sunt, quam amarus sit juveni mulierculæ maritus senex & effœtus, cujus ætas frigida est & ficca; ac proinde ad matrimonium inepta. Conf. Guazz. d. l. diff. 5. Elegans responsum Maximiliani 1. Imper. cum ipsi consuleretur ut senex Annam Ladislai Regis Ungar. filiam duceret. vid. ap. Zinkgraff. 77.

Th. XXIII. Inter Conjuges, qui pulchritudine & forma potius illecti fidem matrimonii promiserunt, hoc consummato, si probitatem & animi dotes abesse intelligant, multiplices oriri lites experientia stultorum magistra testatur. Quid enim est speciosa mulier? sepulchrum dealbatum nisi fuerit sobria, casta, pudica. Pulchritudo scilicet sine his virtutibus est præcipitium patens, venenum insipientibus compositum. Chrysostom. *super Psalm.* 50.

*Pulchritudo
matrimonii
facit rixarum
plenum.*

Th. XXIV. Notabilis deformitas haud rarò remissum reddit amorem, imò fenestram aperit adulteriis; nam ut ait Ausonius:

*Deformitas
unanimitatem
Conjug.
dissipat.*

*Deformis uxor cui sit, ancilla elegans,
Uxorem habere, subigere Ancillam velit.*

Optimè ergo Antisthenes adolescenti consulenti cujusmodi uxorem ducere expediret? Resp. si formosam duxeris,

habebis communem, sin deformem, habebis pœnam. Suafit ergo ducendam esse uxorem, quæ nec fastidium viro moveret, ob deformitatem, nec ob insignem formam peteretur ab adulteris. Hoc dictum Bianti tribuit Gellius, sed Antistheni Laert. l. 6. c. 1.

It. Ignobilitas.

Th. XXV. *Ignobilis* si nupserit *Nobili*, sæpius experitur à Coniuge se despici, quod inferioris sit conditionis, dum enim altera pars progeniem & stemma suum totâ die exaltat, altera ad iracundiam accenditur; hinc contentiones inter Coniuges exoriuntur, quæ nunquam fortiuntur finem Guazz. d. Civ. Conv. Diff. 5. Experta id fuit Anna Pauli Hunovii Palatini Belsensis filia quæ à Boleslao Mazoviorum Duce prorsus repudiata, tanquam non ex satis superbo locô orta Cromer. l. 28.

Nec minus paupertas.

Th. XXVI. Uxor præsertim benè dotata Marito *paupertatem* acerbè objiciendô eumque propterea ludibrio habendô, parat injurias & frigusculum. Chilon dicere solebat uxorem humilem modico apparatu ducendam esse, ne pro Coniuge dominam in domum accersat, sat enim dotata venit puella, quæ pudicitiam & honestos mores secum affert. Hodie in proverbium fere abiit: Philosophos & viros doctos plerunque imperiosis mulctari mulieribus. Tiraquell. de retract. convent. ad fin. D. PRÆSES de Annulo Pronub. th. 22. n. 5. Quæritur: Num uxor teneatur alere maritum, si ipse non habeat, unde se alere & sustentare possit? quod affirm. cum nihil tam humanum sit, quàm fortuitis casibus prosperis vel adversis Coniugis participem fieri alterum Coniugem. l. 22. §. 7. solut. matr. Wessemb. Consil. 43. n. 148. Carpz. § Pr. For. p. 3. c. 25. d. 7. quo casu maritus etiam de bonis paraphernalibus alendus est. Klock. Vol. 2. Conf. 70. n. 93.

Abusus vestim. & ornatus lites producit.

Th. XXVII. *Abusus vestimentorum & ornatus* uxorum nimis non potest non interdum displicere maritis & frigusculum excitare. Quamvis maritus, qui ad omnia onera & incommoda matrimonii tenetur Klock. Vol. 3. Concl.

118. n. 18. etiam vestes pretiosas, secundum personarum dignitatem, suppeditare obstrictus est. Angel. in decret. 15 C. ex quib. caus. infam. irrog. Aretin. in §. fuerat. 29. circ. fin. 7. de Action. & fœminæ personis clarissimis nuptæ corrumpant radiis maritorum. l. 8. ff. de senat. l. 13. C. de dignis. lib. 12. hoc est, jure vestiendi cum indulgentiori etiam ornatu utuntur, quoniam duo sunt in carne unâ. c. debitum X. de bigam. Magnif. D. STRUV. Dissert. de eo quod just. circ. Vestit. sect. 2. tb. 12. Fœminarum tamen cordibus memoriale istud infixum sit, ut modestiam in ornamentis adhibentes maritis potius placere studeant, quàm ad Zelotypiam eos provocare, aut etiam in causa esse, ut vanæ & leves æstimentur, Guazz. l. cit.

Th. XXVIII. Friget quandoque amor, quando *Ob morbum*
 Conjux morbô contagioso & incurabili decumbit. Nequa- *contagios.*
 quam tamen propter tales morbos faciendum est divor- *friget amor.*
 tium nec deferendus ægrotans. c. 1. & 2. de conjug. leprof. c. bi qui 25. caus. 32. qu. 7. Beza tr. de divort. p. 97. Schneidew. ad tit. de J. de nupt. Beust. tr. de matrim. c. 11. quamvis aliud sentiat Sarcirius in lib. de caus. matrim. 189. & 230. qui tamen teste B. D. Schröterô in Diss. de eo quod just. in punct. marital. desert. tb. 14. suæ sententiæ paucos hætenus invenit patronos

Th. XXIX. Conjugis Absentia vero obest conjugali *Remittit a-*
 amor Ovid. l. 2. de art. amand. *mor ob ab-*

*Si mora tuta brevis, lentescunt tempore cura,
 vaneſcitque absens, & novus intrat amor.*

sentiam.

Et ap. eundem Poetam Dejanira se viduam esse profitetur quoniam nullas ex marito Hercule oblectationes referebat, cum fere semper longius abesset:

*Vir mihi semper ab est, & conjuge notior hospes,
 monſtraque terribiles perſequiturque feras.*

Ipsa domo viduâ votis operosa pudicis

Torqueor, infesto ne vir ab hospite cadat.

Duplex

Duplex autem est mariti absentia, alia *Necessaria & Probabilis*, Salicet. *in l. 2. n. 1. C. de sponsal.* alia *malitiosa*. Beust. *de matr. part. 2. c. 24.* Datur etiam *media* quædam, quæ appellari possit *temeraria*, quando maritus ex petulantia quadam gulæ ergò plus justo abest, vel uxor minus curiosa in re domestica, colloquiis familiarium nimis indulget per aliquot forsitan hebdomadas absque causa legitima domum mariti quasi fugitet. *Quoad primam* uxor non habet quò remittat amorem, *Nov. 117. c. 11.* *Secundam* quod attinet, ut quis pro desertore haberi possit, illud probari debet, & processus desertionis ad dissolvendum matrimonii vinculum à magistratu concedi potest. Magnif. D. STRUV. *Exerc. 26. th. 54. & Ex. 30. th. 44.* *Quamdiu* conjux conjugem absentem præstoletur? vid. Carpz. *JPr. Eccl. l. 3. d. 5. n. 11. & seq.* *Tertia absentia* moribus corrigenda est. Nihilò enim minus bona œconoma surgit mane, & laborabit, quæret lanam & linum, & quæ reliqua verba sunt Salomonis. *Prov. 31. v. 10. & seqq.*

Matrimon.
coactum
jurgis ab-
undat.

Th. XXX. Coactum matrimonium solent etiam comitari frigusculum, rixæ perpetuæ & scandala publica, Sanchez. *l. 2. disp. 13. n. 4.* Dantur adhuc plures causæ quæ movent frigusculum in amore conjugali, v. g. si Parentes unius Conjugis focro vel nurui invideant & vice versâ; vel quando uxor contumeliis ab extraneo afficitur, neque illas vindicat maritus; vel quando Conjuges separatis dormiunt lectis; vel si dissentiant circa educationem liberorum, præsertim cum matrum indulgentia corrumpat liberos. Et quis omnes ordine poterit narrare? Pergimus brevitatis studio ad

CAPUT IV.

complectens

FRIGUSCULI CONCOMITANTIA.

Th. I.

JUre equidem civili, dissensu & intercedente forsan offensione quadam possunt sponsalia dissolvi. *l. 1. C. de Sponsalia an sponsal. verbis modo solennibus: Conditione tua non utilis. l. 2. §. 2. ff. de divorc.* juxta expressis, eam forte ob causam, quod sicut solô consensu ineantur sponsalia *l. 4. ff. de sponsal.* ita & dissensu possint dirimi, dum tam naturale nihil, quàm eô genere quidque dissolvere, quo colligatum est. *l. 35. & 153. de R. J. Nov. 140. c. 1. Menoch. de Presumpt. l. 3. præf. 1. n. 26.* Nec dissentit Pontifex *inc. 2. X. de spons.* si se ad invicem admittere noluerint, ne forte deterius inde contingat, ut talem scilicet ducat, quam odio habet, videtur quod ad instar eorum, qui societatem contrahunt & postea sibi remittunt, hoc possit in patientia tolerari. Quod tamen apud Nostrates non permitti, nec ob quamvis causam publica sponsalia annullari posse testatur Carpz. *7 Pr. Consist. l. 2. def. 173. n. 5.*

Sponsalia an possint dissolvi ob mutuum dissensum?

Th. II. Ex quo fluit quod sponsalia publica & perfecta frigusculum non valeat dissipare, quod etiam Carpz. *d. l. def. 176. n. 6.* exprimit: quid si levissimis de rebus inter sese altercari cœperint personæ desponsatæ & unum aliquod verbum litem concitaverit? Non certè æquum est malitiæ huic indulgeri & oppidò sponsalia dissolvi, sed Judici incumbit operam dare ut in gratiam redeant, si tamen forte hoc dissidium videretur præcedere infelix matrimonium, permittendum esset repudium. D. Gerhard *de Conjug. §. 160.* Similiter hoc posse indulgeri in sponsalibus de futuro, nullum est dubium: si scilicet eâ nituntur conditione, nisi quid intervenerit, quod datis promissis obstet, tunc enim non inducunt obligationem aut nexum tam firmum ac indissolubilem, quo minus valeant pœnitere contrahentes. D. Gerhard *L. de Conjug. §. 164. Cypr. de*

Friguscul. non rescindit sponsalia publica.

D

spons.

Spons. c. 13. §. 12. tametsi melius omninò faciant sponsi imprimis, si prima virginum disfidia ad tempus ferre discant, hoc enim qui non faciunt idem agunt authore Plutarcho, quod ii, qui offensi labruscis, uvas maturas aliis relinquunt.

*Olim frigusculo orto
permissum
fuit divor-
tium.*

Th. III. Sæpius olim frigusculi inter Conjuges fuisse Comitem divortium hinc inde legimus. Si credimus Seldeno *l. 5. c. 7. de Jur. Nat. & Gent. sec. disc. Ebraeor.* pro lubitu concessum fuit *Jure Noachidarum*, citra omnem causam matrimonia distrahere, adeò ut instar sociorum contractus haberentur, & eousque durarent, dum permanerent in eodem consensu & renunciare non placuerit *Tempore Mosaico* per modum dispensationis DEUM tolerasse divortium etiam ob levem causam, videre est Deut. 24. v. 1. ne deterius quid inde oriretur. Sanchez. *l. 10. d. 1. fol. 328.* quin, quod tamen S. Script. non congruum est, præcepta fuisse hoc casu divortia putarunt Judæi. Osiander. *ad Grotium p. 376.* De *Græcis* idem testatur Scaliger *ad Euseb. num. 215.* Cypr. *de sponsal. c. 13. §. 7.* Neque Romani in hoc passu fuere, difficiles: Nam non solum ob graves causas sed & minima friguscula indulta divortia fuere, quoniam, uti conqueritur Imperator in præfat. *Nov. 140.* alia ratione pax inter Conjuges conciliari non potuit, vel secund. Plutarch. *in Emil.* quod Romani neque moniti recesserint ab inimicitia, neque abstinerint, licet minis ab odio territi, & sic pax nulla invenienda fuerit, sed magis per levia friguscula majora orta inter Conjuges disfidia. Frequentiam divortiorum apud Roman. etiam temporibus sequentibus innuit Tertull. *Apolog. c. 6.* hisce verbis: Repudium jam & votum est & quasi matrimonii fructus. *Ceilonensibus* adhuc levior sufficit causa ad distrahendum matrimonium: Plantant nimirum arborem & sibi invicem tradunt vestem, quâ contrita, si nullos jam fert fructus arbor, statim divertunt & sic pacta tollunt. J. J. Saar. *Itiner. p. 56.* De *Turcis* dicitur quod aliquoties inter illos liceat dare repudium uxori, ob levislima friguscula, si ve-

rò tertiâ vice datum fuerit vel modo semel ex iracundia dictum: *Uafala!* (quod idem significat ac repudium ter renuncio,) prius hisce non fas est iterum coire, quàm à sacerdote tertius quidam adductus cum muliere concubuerit & deinde iterum ab hâc fuerit solutus, qui mediator suum insuper accipit honorarium.) Hac solennitate usus aliquando fuit *Solymanus*; cum verò tertius ille requisitus uxori magis placeret quàm ipse Imperator, hâc cum isto fugam conscivit, nec unquam priori marito iterum cohabitare in mentem duxit.

Th. IV. Quemadmodum autem hominibus indignum videtur, tam grave negotium parvi pendere & ob minima friguscula illud dirimere, quod solus Matrimonii Author DEUS dissolvere sibi reservavit. *Matth. 19. v. 6.* Sic & non solum sub Christianis statim Imperatoribus, liberior quondam repudiandi licentia paulatim restricta fuit. vid. *Selden. Uxor. Ebr. l. 3. à c. 18. usque 31. l. 8. C. de repud. id quod repetitum & exactius traditum à Justiniano. Nov. 22. c. 15. & Nov. 117. c. 8. 9. 10.* Sed & hodie in nostris terris non nisi gravissimis de causis divortium conceditur. vid. *Magnif. D. STRUV. Exerc. 30. lb. 40. & seq. Carpz. Jurisprud. Consistit. l. 2. tit. 11.* Et quamvis mitior adhuc sit separatio quoad thorum & mensam, nihilominus tamen ad eam permittendam hodie haud sufficit quodvis frigusculum. *Beust. de matrim. c. 9.*

Th. V. *Quid ergo hodiè operatur?* Sponsos quod attinet, nullum inter eos dari puto frigusculum, quod amoris affectusque calorem non temperet, propensionem minuat, & debitam reverentiam, humanitatem, blanditiasque, (quarum ope potissimum mentes sponzorū consolidantur,) faciat jacturam pati, ut vix ita *Agatboni* Poetæ assentiri possimus, qui jucundissimum amantibus esse asserit, si ex contentione & litibus cum amasiis in gratiam redeant, sanè, *inquit*, mihi videtur nihil illis delectabilius accidere, hâc voluptate persæpe fruimur frequenter litigando, gaudium enim capimus, si contrinuat contentio-

Hodie non permittitur

Frigusculum quid hodie operatur? inter sponfos

nem dissolvamus & conciliemus ; si verò æqualiter & consueto more semper ageremus, non experiremur dissidium. *Ælian. l. 2. de var. hist.* Quicquid enim sit, rarissimæ erunt aves, quæ hoc modo amorem indagare aut experiri gaudent. *An verò ob frigusculum inter sponso sponſalitæ largitates repeti possint?* Negativa Responsio ex iis formari poterit, quæ supra dicta *cap. 2.*

Inter-Conjuges.

Th. VI. Frigusculum inter Conjuges pedatim sequuntur varia incommoda, ut enim omnes res, ita & hæc societas, concordia crescit, discordiâ dilabitur. *Salust. Jug. c. 10.* Vacillat sanè amor conjugalis, & ut corpus ægrotat ægrotante capite, sic res familiares subjacent, ortò inter Conjuges dissidiò. Conjugum enim dissensio est totius domus perturbatio. *August. in Psalm. 33.* Quamvis etiam redeant in gratiam, semper tamen aliqualis hæret memoria, unde etiam *Aristo* cuidam interroganti respondit: Nihil citius senescere gratiâ & nihil tam tardè quam injuriam. Quâ igitur si alteruter conjugum affectus est, fit ut manente ejus memoriâ non ubique possit dissimulari animus, ita ut majus malum sensim succrescat & cum eò interitus familiæ. Hinc ex mente *Guazzii de Civ. Conv. Diff. 5.* adeò mirum non est, si dolore & indignatione victa uxor, Diabolos in defensionem vocet & auxilium, & eodem momento homines lascivi occasionem capiant ipsam tentandi & bene de ea sperandi; quo fit, ut ipsa promptè se ad omne id accingat, quod & ira & desperatio ipsi persuadent. *Uxores inquit Tiraquell. in 8. l. Connub. Gl. 1. part. 6.* quò de maritis sumant vindictam, verendum est, ne alienis viris se substernant.

An mulier durante frigusculo necesse habeat obedire marito?

Th. VII. Offert sese nobis *Quæ. An mulier nihilominus Viro præstare debeat observantiam & conjugalem amorem durante frigusculo, cui ille causam dedit?* Quod, tametsi viri non sint laudandi, qui (verbis utar *Barlei*) uxori non nisi rogati respondent, qui museis se abscondunt ut cochleæ testis, qui intempesta nocte atramentum bibere malunt, quàm cum tenera conjuge *Ἀγ. λέγεσθαι*; multò minus illi qui

qui verbis verberibus aut quocunq; modo frigusculum pariunt, propterea tamen uxoribus non licet, suum marito denegare officium, id enim facientes talibus virorum moribus offensæ, perinde faciunt ex mente *Plutarchi*, ac si quis ictus ab apibus mel relinquere vellet; sed potius reverentia & amore eum prosequatur, donec vincat, præsertim cum frustra amorem poscat ille, qui ipse non affert, sicut frustra ad accendendum facem admovet, quæ ipsa non est accensâ, ut loquitur *Lipsius*. De mulieribus *Moscovitici* vulgò dicitur æstimare illas maritorum amorem ex plagarum multitudine *Horn. in Orb. Polit. pag. 37.* quod licet cum aliis magis fabulâ crediderim, vid. *Getlebens Europa pag. 216.* propterea tamen laudari merentur, quod uti ex relatione scriptorum fide dignorum constat, castigatæ verberibus non minori amore aut minus fideli affectione amplectantur viros, quàm aliàs solent: norunt scilicet facilius perferre adversa, quia maritorum conversationis & vitæ liberioris sese faciunt participes. Illos enim ænopolia ineuntes, quasi domum essent ducturæ, statim sequuntur, colaphos interim, si qui impinguntur, patienter ferentes, modò gulæ satisfieri sentiant, in quo nimirum nec ipsis maritis sunt inferiores, sæpè etiam accidit ut quævis suo marito sopito ebrietate infideat, poculis tamdiu inter se certantes, donec itidem somnò occupatæ solum petant & sic unâ cum maritis sobrietati restituantur. Quoad primū ergo, constantiam, nempe amoris, non verò reprehendendum hocce vitium aliis uxoribus poterunt esse exemplar, ut scilicet ob friguscula nihil amoris remitti sinant, sed vel humanitate tollant lites, vel si graviores fuerint, quàm quod perferre aut privatim conciliari possent, ope Judicis huic malo quærant remedium.

Th. VII. Quæritur porro, an pendente frigusculo maritus alimenta uxori præstare teneatur? ubi distinguendum, an maritus; an uxor causam præbuerit. Etenim si ille atrocitate sua in culpa fuerit, non potest liberari à præstandis uxori alimentis, quò facit præjudicium quod in casu separa-

An tunc debeat alere uxorem maritus?

rationis quoad thorum & mensam allegavit Carpz. *7Pr. Eccles. l. 2. def. 213.* Si verò uxor culpâ suâ abesset, alimenta à viro petere non potest, Beust. *de Jur. Conn. part. 2. c. 9. sub fin.*

*An acquæ-
stus Conju-
galis mane-
at commu-
nis?*

Th. IX. Eadem hac distinctione satisfaciunt DD. quæstioni, *an acquæstus Conjugalis etiam eò tempore maneat communis?* Ita ut si maritus author sit dissidii, nihilominus uxor lucretur medietatem acquæstus facti à viro, & vicissim maritus dimidium recipiat ab uxore facti, si huic causa adscribatur. Conf. Joh. Garfias *de acquæst. Conjug. n. 59.* & Besold. *Vol. 5. Conf. 260.*

*Cui commit-
tenda edu-
catio libe-
rorum?*

Th. X. Paucis etiam inquiramus, *Cuinam Conjugum hoc casu committenda liberorum educatio?* Si gravius fuerit frigusculum, distinguerem inter partem nocentem & innocentem, huicque magis quàm illi committendam esse putarem, quia afflicto parcendum magis & dolendum, quàm nova addenda afflictio. Hoc a. fine dubio fieret, si delectatione, quam capiunt parentes ex suavi sobolis amplexu & blanditiis, privarentur. Præsertim cum & pars nocens eò ipsò sese indignum hâc educatione reddiderit, quin & ex tali nonnihil periculi apud eam subesse videatur. Quod tamen omne judicis in primis arbitrio ad exactiorem personæ, aliarumque circumstantiarum requisitionem merito commendandum.

*Num liceat
Conjugi ob
frigusculum pri-
vare Conjug.
Success. aut
Port. statut.*

Th. XI. Diximus, non pauca incommoda frigusculum concomitari. Inter ea autem eminet & illud, quod uterque Conjugum sæpius amoris sui effectus coarctet, imò penitus tollat. *Quid si igitur auderet Conjux Conjugem excludere à Successione, Portionem statutariam ipsi adimendo vel saltim minuendo?* Resp. nec primum posse, quia justum permanet matrimonium. Andr. Kohl. *de Success. Conjug. Part. I. n. 41. & seq.* Carpz. *7Prud. For. P. 3. Const. 26. def. 16.* nec secundum aut tertium, quia itidem stante matrimonii vinculo testamento id efficere non est licitum. Magnif. D. STRUV. *Ex. 38. th. 40.* & D. Stryk. *Tr. de success. ab intest. c. 5. artic. 3. §. 7.* Conf. Carpz. *7Pr. Conf. l. 2. def. 215. it. 7Pr. For.*

p. 3. C. 26. def. 15. Berlich. ex parte Carpz. contradicentem

P. 3. Concl. 36. n. 27.

Th. XII. Tandem & hoc meritò moveri potest dubium, Num Conjuges friguscule durante admittendi sint ad S. Cœnam? Distinguiamus inter Conjugem reconciliationem appetentem & detrectantem. Ille salvâ conscientia potest admitti, hic verò minimè, quia eò ipsò dum perseverare vult in litigiis nec æqua reconciliationis remedia arripere, se Cœnâ Dominicâ indignum reddit, tamdiu donec resipiscat & bona conscientia accedere possit. Conf. Consil. Theol. Wittemb. Vol. 4. pag. 56. Carpz. JPr. Consist. l. 2. def. 288. n. 13.

An eo tem-
pore admit-
tendi sint
Conjuges ad
S. Cœnam

Th. XIII. Ob tenerrimam affectionem, qua se mutuo prosequuntur Conjuges, non valet testimonium, si quod sibi invicem perhibere vellent, per vulgata. Aft Qu. an etiam instante friguscule sit valiturum, quia ratio cessat, nimia scilicet affectio? quod pro gradu friguscule dicendum putamus, ut tamen arbitrio Judicis committatur, an semiplenè an minus quàm semiplenè probet.

Durante
frigusc. ad-
mittitur
Conjugis fa-
stimonium,

CAPUT V.

DE

REMEDIIS ET MODO PROCEDENDI IN CAUSA FRIGUSCULI.

Th. I.

SI inter Conjuges vel Sponsos friguscule ortum fuerit, melius faciunt, si dissimulare id studeant, ne aliis innotescat, neque invidi, utpote à quibus nec mendicus liber est, habeant, quod in sinu gaudere possint, insuper, quantum possibile, sibi invicem condonent & humanæ imbecillitati multum tribuant, cum præsertim hac Christiana charitas requirat, ut nimirum faciles simus ad ignoscendum inimico, quin & iis beneficiamus qui nos oderunt. Prov. 25. v. 21. 22. Matth. 5. v. 44. Tolerent præsertim imbecillitatem eam, quæ corrigi nequit, quod non sine laude fecisse legitur Elisab. Gonzaga uxor Guidonis Ubaldi, de qua latius D. PRÆSES in Pres. Dom. Illust. c. 3. pos. 10.

Quid potis-
simum Con-
jugibus in-
cumbat ob-
servare fri-
guscule na-
to.

Th. II.

Cabere de-
bet iracun-
diam.

Th. II. Consulat etiam iracundiæ causam danti frigusculo maritus, monito *Athenodori* Philosophi, qui Augusto inter alias regulas dedit & hanc, ne si irâ obrueretur, quid ageret, antequam XXIV. literas grâcas secum recitasset. Sic & cuidam aliquando consultum fuit, ut si famulum suum pedibus vellet conculcare, prius exuat calceos, siquidem interea remitteret ira. Probè observandum illud:

----- *Ne frena animo permitte calenti,
Da spatium tenuemque moram mala cuncta ministrat
Impetus.*

Imitetur potius viperam, alias nequissimum bestiarum genus, quæ ubi coeundi cupiditatem assumerit cum muræna maritima, & hanc vocatam ad conjugalem amplexum adventare senserit, evomit venenum; ita & maritus deponat tumorem cordis, asperitatem morum, si cum uxore conversari desiderat. *Ambros. l. 5. Hexaem. c. 7. & Achill. l. 1. Amor.* Insuper Cedro dignæ sunt leges, quibus observatis pacificè mariti cum suis vivant uxoribus ab *Anton. de Guevarr. Horolog. Princ. l. 2. c. 21.* notatæ, Quas vid. ap. D. PRÆS. in *Præsid. Dom. Illust. c. 4. pos. 9.*

Quomodo
se gerat u-
xor erga
maritum.

Th. III. Uxor vicissim sibi ab illatione injuriæ vel verbi injuriosi erga maritum temperet, nec rixis ulterioribus det occasionem, imò morositatem mariti toleret, neque semper *Echo* resonet in ædibus. Si maritus fuerit crudelis & imperiosus, humilitate erit vincendus; vociferabitur ille, hæc tacebit; responsum enim prudentum foeminarum est silentium, nec prius loquatur aut voluntatem suam declaret, quàm ubi quieto ille animo fuerit atque tranquillo. Si obstinatum eum animadverterit, ipsa cedit: memor illius, quod ut pulverem tormentarium lac extinguit, ita silentium foeminæ iracundiam viri sedet. *Guazz. l. cit.* Nihil conjuges inter quos jurgii aliquid aut discordiæ intercescit, ocyus faciliusque, aut gratius ad amicitiam revocat quàm blanda Vox & Venus; hæc est discordiæ sedatrix, *Tiraquell.* Propterea Veteres Mercurium

rium juxta Venerem collocabant: quod voluptas nuptialis, ratione aptoque sermone maximè indigere videatur.

Tiraqu. p. 9. gl. 1. in 8. leg. Connub.

Th. IV. Erumpente friguscule, & vulgo innotescen- ^{Compositio}
te privatim commonefaciat Conjuges & Sponfos. ^{amicabilis} ^{Confectio}
^{naarius}, ut desistentes à discordia humaniter cohabitent; ^{orto frigu-}
si verò ad Magistratum deveniat causa, hic non minus o- ^{sculo prius}
peram navabit, ut inter litigantes amicabilis compositio ^{tentanda,}
locum inveniat, quàm itidem neglecta instituenda est actio ^{antequam}
coram Judice Ecclesiastico, tanquam competente, qui ta- ^{procedatur}
men præsertim ubi processus desertionis petitur, circum- ^{ad agendum.}
spectè & providè sese gerat. Carpz. 7 Pr. Eccl. l. 3. def. 58. n. 1. 2.
non autem actio injuriarum locum habet, ne fama scilicet
mariti lædatur. l. 2. rer. amot. l. 11. ff. de dolo. nec processus
ordinarius, sed summarius. vid. D. PRÆSES in Diss. Inaug.
de Judic. Ecclesiast. th. 27. formulam libelli in hoc casu sup-
peditat D. Schwendendörffer in Summ. Act. For. Expos. spec.
c. 1. sect. 8. sequentem:

P. P. Saget Kläger/wie daß Beklagte/sein Eheweib/sich
selbst von Ihm ohne einzige Ursach gesondert: Und ob er wohl
deshalben zureden/und daß Sie sich wieder zu Ihm halten solte/
errinnern lassen/so ist doch in Gute nichts zu erlangen gewesen/
Dannenhhero bittet Kläger Sie darzu anzuhalten/ daß sie ihme
hinwieder ehelich beyzuwohnen schuldig.

Th. V. Exceptiones à parte Rei sunt: *Sevitia, Suspicionis Contra A-*
de adulterio; non præstiti Debiti Conjugalis; non Impletæ Con- ^{clorem que-}
ditionis & alia, quæ ex supra dictis possunt desumi. Item ^{nam sint}
exceptio Intentionis seu Facti, quæ ultima utiliter opponi- ^{exceptiones?}
tur, quando v. g. abiit uxor & abfuit per aliquod tempus,
maritusq; agit ad divortium ob malitiosam desertionem,
quam hoc modo negat, etiamsi concedat, ut fiat divor-
tium modò non sub nomine malitiosæ desertionis. Pro
actore si fuerit pronunciandum, sententia est sequentis
tenoris:

In Sachen zc. daß Beklagtin ihres Vorwendens unge-
achtet Klägern hinwieder ehelich beyzuwohnen/ dargegen er sie

E.

mit

mit nothdürfftigen Unterhalt zu versorgen/ und sonst mit aller Bescheidenheit gegen sie sich zu verhalten schuldig.

Quando verò egerit actor ad divortium petendo :
Daß zwischen Klägern und Beklagtin die vollzogene Ehe cassiret / Kläger davon losgezehlet / Ihm auch als unschuldigen Theil anderweit zu verhehelichen nachgelassen werden möchte/ & allegatæ causæ ad separationem nō sufficiunt, solet ita pronunciari : Daß die gesuchte Ehescheidung aus angeführten Ursachen nicht statt findet/ es ist aber zuörderst beyden Theilen beweglichen zuzureden / sich künfftig gegen einander also zu bezeugen/ wie es Gottes Ordnung und die Erbarkeit erfordert/ immittelst ist Beklagtin Klägern beyzuwohnen / er auch sie mit nothdürfftigen Unterhalt *ic. ut supra.*

Maritus limites sibi positos transiliens, quomodo puniatur.

Th. VI. Maritus, qui limites castigationis excessit, arbitrariâ plectitur poenâ. Carpz. *Pr. crim.* p. 1. q. 12. n. 51. cautionem præstare tenetur & concurrentibus aliis circumstantiis separationem cohabitationis mulier petere potest. Beust. *de spons. & mar.* p. 2. c. 9. Carpz. *l. cit.* ubi hoc præjudicium:

So wird H. R. solcher Begünstigung wegen/ wofern Er derselben geständig oder übersühret/ 12. Tage lang mit Gefängnis gestraffet/ und ist nachmahls seinen Weibe gnugsame caution zu bestellen schuldig/ daß Er Ihr hinführo mit Vernunft beywohnen wolle/ und Sie nichts thätliches von Ihm zu befahren/ daneben ihm untersaget wird/ von solchen übeln Beginnen abzustehen/ damit er nicht wiedrigen fals mit gebührender auch wohl einer Leibes Straffe beleydet werde/ und in Fall er gebührende caution zu bestellen und aufzubringen nicht vermöchte/ oder aber das Weib über Vermahnen und Zureden damit nicht zu frieden seyn wolte/ würde Sie zu Bette und Tisch von ihm abgesondert/ und wäre Er nichts weniger dem Weibe gebührenden Unterhalt zu reichen pflichtig/ in Verbleibung dessen würde Sie in die Güter/ ihres nothdürfftigen Unterhalts sich daraus zu erholen/ immittiret und darbey billich geschützet.

Quod si reconciliatio interveniat, cautione præstita marito mulierem cohabitare debere, commun. affirmant

mant DD. quamvis ex parte ab iis recedat Henr. Brouver.
d. jur. Connub. l. 2. c. 29. n. 19.

Th. VII. Si mulier pœniteat, non habet maritus, *Mulierem*
quod reconciliationē repudiet, sed eam recipere tenetur *pœnitentē*
prout à Consist. Suprem. Dresd. responsum fuisse testatur *recipiat*
Carpz. l. 2. 7 Pr. Consist. tit. 12. def. 217. Obwohl aus der Zeu- *maritus.*
gen Aussage zu befinden / daß des Pfarrers Weib ihren Ehe-
manne mehr / denn er ihr zur Uneinigkeit Ursach gegeben. Die-
weil sie aber ihme derentwegen Abbitte thun und Besserung
zusagen / Er aber solche nicht annehmen wollen / und darbey un-
sers ernstens Zuredens ungeachtet beharret / so wird ihm hiermit
bey Verlust seines Dienstes auferleget / sein Weib mit ihrem
Kinde hinwieder alsobalden zu sich zu nehmen und mit noth-
dürfftigem Unterhalt zu versorgen / dargegen soll Sie sich gegen
ihm alles gebührlichen Gehorsams und Ehrerbietung zu bezeugen und der Haushaltung treulich vorzustehen schuldig seyn etc.

Th. VIII. In puncto sponsaliorum, quando ob ini- *Quomodo in*
micitias una pars solutionem petit vel matrimonium *sponsalio-*
consummare detrectat ; causæ verò non sufficientes *rum puncto*
sunt, ita solet pronounciari: Aus den Acten allenthalben *pronuncie-*
so viel zu befinden / daß Kläger dasjenige so ihm zu beweisen ob- *tur?*
gelegen und er sich angemasset / zur Nothdurfft erwiesen / und ist
derogen / Beklagten beschehenen Einwendens ungeachtet / die
Klägerin versprochene Ehe durch Priesterliche copulation und
eheliche Beywohnung förderlichst zu vollziehen schuldig / in Ver-
weigerung dessen aber wird Sie durch Obrigkeitlichen Zwang
dazu nicht unbillich angehalten. B. N. W.

CAPUT IV. ET ULT.

DE

EXTREMIS FRIGUS CULI.

Th. I.

EX definitione frigusculi supra tradita patescit con- *Extrema*
jugalem amorem ipsò existente quidem remissio- *sunt frigu-*
rem fieri, non tamen plane evanescere aut interi- *sculi vel*
tum pati. Inde colligo, extrema hujus esse aut nul- *nullus amor.*
lum planè aut nimium amorem. NULLUM videlicet intelli-

go, quando v. g. Conjux Conjugem interficere conatur
uti legimus de Rege Ponti Mithridate, filio Clotharii Chil-
derico, Clytemnestra uxore Agamemmonis, Semiramide,
Rosimunda uxore regis Longobardorum Alboini & plu-
ribus aliis; vel si quovis modò vitæ alterius struit insidias,
quare etiam tali periculo præsentē separatio concedi so-
let, quoad thorum & mensam c. 1. X. de divort. nisi ubique se-
curitas sufficiens præstetur à Conjuge struente insidias. c.
13. in fin. c. 8. X. de restit. spol. Carpz. 7 Pr. Consist. l. 2. d. 217. n. 1.
D. Richter. Vol. 1. part. 5. Cons. 17. n. 19. Anthon. Thesaur. De-
cis. 130. n. 3. Farin. Op. Crim. p. 5. q. 143. n. 158. An verò con-
cedenda sit separatio, si uxor mariti saltim bonis vel honori in-
sidias struxerit? quod singulariter notandum asserit D.
Richter. Vol. 1. p. 5. Cons. 17. n. 19. iudiciò aliorum examinan-
dum relinquo.

Th. II. Nullum deinde amorem agnosco si Conju-
ges vel sponsi capitalibus laborent inimicitiis, utpote ex
quibus priori th. dicta oriri solent. Manifestè etiam distin-
guuntur à frigusculo, eò quod sufficientem præbeant cau-
sam repudio & separationi Cohabitationis Farin. Op. Crim.
p. 5. q. 143. n. 145. Carpz. l. 2. decis. 176. n. 5. & c.

Vel amor
nimius.

Th. III. Nimius amor consistit in excessu debiti
conjugalis amoris & ut plurimum æquè cum illò est vitu-
perabilis, qualem non solum Indorum præsertim in Re-
gno Cambajæ degentium uxores post mortem mariti
haud coactæ licet nonnunquam invitæ exhibere solent,
dum in tumultu istius ad cineres se redigi patiuntur. vid. J.
J. Saar in Ost-Indianischen funffzehen Jährigen Kriegs-
Dienst. fol. 105. sed & alios sponte olim exhibuisse legimus:
Uxor Senecæ, ut marito tam mortis quàm vitæ esset comes,
venas incidere jubet; Arria nocenti Pæto suo porrigit
cultrum madentem proprio sanguine, Annia unum intrat
cum marito sepulchrum & ibi vitam finit; Dido, cum Æ-
neam amitteret oculis præ dolore se interficit, Marcus
Plautus unà cum uxore mortua cremari maluit quàm sine
ea diutius vivere, Hi sanè omninò sunt reprehendendi,
quum

uum mortem absque necessitate spontè oppetierint, & sic illud vindicarint, quod DEUS sibi solus reservavit. *Deut. 32. 39. 1. Sam. 2. 6. Sap. 16. v. 13. add. Guil Grotius Princ. Jur. Nat. c. 7. §. 4. Molina de J. & J. tom. 4. tr. 3. Diss. 1. n. 2. & 3. Hugo Grotius de Jure B. & P. l. 2. c. 21. §. II. n. 2. & l. 3. c. 20. §. 43. n. 2.*

Th. IV. Miror exemplum amatoris cujusdam, qui eodem fermè momentò etiam osor nimius amariæ extitit. Scilicet Nobilis aliquando Hispanus puellæ sui generis amore adeò arsit, ut nec propriæ vitæ istius causa parcere promiserit. *Exemplum Amatoris qui statim factus osor nimius.* Quam animi levitatem sic tentavit puella: Chirotecam nimirum ad pedes Leonis inclusi projicit, contendens, ut nobilis illam Leoni eripiat & sic promissi sui memor amoris edat signum. Juvenis sine mora in fossam descendit, Leoni Chirotecam eripiens attulit, sed simul insignem inflixit puellæ alapam & tantò postmodum eam profecutus est odiò, quanto olim amore.

Tantum de *Frigusculo* dixisse sufficiat. Interim B.L. haud succenserebatur brevitati & si quæ minùs accurata fuerint, limatiori judiciò complebit; Mihi quippe non tam animus fuit hanc materiam pro merito elaborare quam in qualicunque elaboratione vires periclitari.

COROLLARIUM LOCO

Casus ex *l. si merces §. 4. ff. loc. cond.*

Otto à B. & Margaretha à S. Conjuges omnia bona sua tam mobilia quam immobilia *D. Arnoldo E. & Ludovico Z.* donarunt ita tamen, ut ipsis donatarii ad dies vitæ præstarent alimenta & corpora defunctorum pro personarum conditione humanda curarent, quod etiam factum. Postea verò cum anno 1647. *Margarethæ* defunctæ cognatus *Fridericus R.* Supremus Militum Præfectus totam hæreditatem peteret, in specie etiam

etiam cistam Documentorum literariorum plenam,
quam inter mobilia isti acceperant, à Ludovici Z. de-
functi filio primogenitò Georgio prætendit, & quia pro-
lubitu ipsi statim non satisfactum, minatur ignem, quin
& Georgio mortem, invadit hujus bona eademque spo-
liat &c. & sic ab hoc solo degente in urbe N. (cum Arn-
oldi E. hæredes in urbe H. tanquam tutiori loco habita-
rent,) omnia postulavit eique soli multa dedit damna.
Qu. ergò, Num Georgii Z. *Sorores* ac *Fratres*, nec non
Arnoldi E. hæredes damnum perpeßum pro rata resti-
tuere teneantur?

D. Arnoldi E. Hæredes *Negant*,

Quia factum hoc violentum pro casu fortuito es-
set habendum, hic autem in nullo bonæ fidei iudicio præ-
standus *l. 6. C. de pignor. l. 4. C. de peric. tit. & Curat. l. 23. ff. de R. J.* & quod ipsi neque in dolo essent neque in culpa. Opponunt igitur exceptionem non compe-
tentis actionis.

Georg. Z. *Affirmat*.

Per *l. si merces 25. §. 4. ff. locat.* ubi dicitur: *Culpa autem & illud annumeratur, si propter inimicitias ejus vicinus arbores exciderit.* & *Carpz. lib. 6. t. 10. Resp. 107.* Si ab inimico alicujus incendium immissum atque per hoc vicinis damnum datum, tunc culpa ejus incendium exortum censetur, cujus ob inimicitias hoc factum.

Jam verò, quia ob inimicitias D. Arnoldi E. & Patris Ludovici Z. Georgius Z. tanta passus fuit damna, reliqui ad resarciendum meritò tenentur. Ad quod Facultas Juridica Helmstädienses consulta ita

Respondit,

Als Ihr wieder beykommende und mit Num. 1. 2. biß 144. bezeichnete Acta zusamt euren Schreiben zugesand und euch über die Frage (Ob nemlich Euer Ge-
schwis

chwister und Herrn D. Arnold. E. Hæredes den von Ob-
bristen-Lieutenant N. Euch. zugefügten Schaden pro rata
tragen zu helfen und zu erstatten verbunden? des Rech-
ten zu informiren gebeten. Demnach erkennen wir dar-
auff nach fleißiger Erwägung vor Recht / weil die von er-
meldten Obbristen-Lieutenant wieder euch getriebene Feind-
seligkeit und Verfolgung auch dahero euch zugestandes-
ner grosser Schade pro casu fortuito nicht zu achten/und
die Ursache der verübten Thätligkeit so wohl Herrn D. E.
als eurem Vater S. begemessen wird (deswegen sie
beyderseits das factum entschuldiget/ mitgemeldten Obri-
sten-Lieutenant in Handlung sich eingelassen und so viel
möglich / in der Güte ferner Gewalt abgelehnet) So sind
selbige Erben als consorten den Schaden insgemein über
sich zu nehmen und dannenhero die E. Erben die Helffte des
erlittenen Schadens Euch zu erstatten verbunden / die an-
dere Helffte aber von euch und euren Geschwi-

stern zu tragen/ V. R. W.

F I N I S.

PROBAT calorem quanta possit innatum
Frigus. *Calorem mentis alta flammantis*
Frigusculum hoc sat est probasse tædarum.
Quod sistis orbi. Nescit indoles, tanto
Quæ gaudet igne gloriæ, atque virtutis
Hæres paternæ est, compati gelu pigrum:
Ex hoc calefcet fama semper infracta.

quod
benè ominandi causa

f.

P R Æ S E S.

Nec

NEc sine sole suo lux, nec sine luce sua sol,
Nec sine laude sua Bremia sedulitas.
Jucundum nexum! quàm conjuravit amicè
Virtus, virtutis, gloria, fida comes.

*Nobil. & Poluissimo DN. AUTOKI,
συνολικῶ & Amico suo
æstimando f.*

M. JO. GEORG. MULLERUS,
Jenens.

Obstupuit penitus simul ac friguscula cæsa
Effervescenti pectore sensit Eris;
Torva supercilium tollens, *primordia jam nunc
Cessant, quid lites post meditabor?* ait.
En venus & memorem se jurat pronuba Juno,
Dum, Fautor, docto pollice sistis opus,
Sic astris juvat Astræam descendere terras,
Nobile sed nomen surgit ad astra Tuum!

*DN. Contubernali ac amico suo
suavissimo gratulab.
apponebat*

PETRUS JOHANNES Preusse/
Gvelpherb.

